

欽定剿平粵匪方略

欽定勦平粵匪方略卷三十二

癸丑年

三月二十日

甲子

琦善陳金綬勝保奏言

臣等自

連獲勝仗後臣琦善隨將大營移至離城三里
之保山臣陳金綬臣勝保亦移營至司徒廟距
揚州城及臣琦善營盤均止三里可以相機進
剿而賊營自聞大兵前來復由江甯添兵救應
較前愈衆臣等靜守不動選派官兵四出哨探

十二日辰刻賊衆數千擁出北門向臣琦善營盤直撲而來勢甚兇猛臣琦善親督總兵雙來等迎擊其鑾儀使武慶等抄截其後賊匪見我兵勢盛復由土城內擁出賊衆接應該鎮將等督率官兵身冒槍礮奮勇環攻並將銅礮連環施放勦殺一時之久轟殺殲斃之賊甚衆賊始紛紛敗竄各官兵盡力追勦至鳳凰橋地方賊

衆不及投入土壘落荒奔竄官兵槍礮齊施殲
斃千有餘人由橋上落水者不可勝數我兵復
回身撲入賊營土城之內痛加勦洗共焚燬賊
營三座奪獲旗幟器械槍礮甚多各營賊匪羣
出救護木城內大礮連環向官兵施放我兵竭
力分勦各賊匪愈殺愈多遊擊白含章中礮陣
亡官兵愈憤各執槍礮刀矛直撲上前臣勝保

臣陳金綬亦督帶參將鞠殿華等帶領各營官兵並由臣琦善撥來差遣之佐領魁斌等率領火器營弁由西路繞過觀音山會合截殺臣陳金綬臣勝保親督將弁分投追剿賊衆紛紛迎拒蠶擁而至我兵奮勇直驅不避兇燄乘風燒燬賊營二座殺死賊匪不計其數賊匪復由城內擁出數千接應臣琦善復督鎮將與臣陳金

綬臣勝保合兵勦擊賊衆均敗入木城時已昏
黑當卽收隊計自辰至酉連獲五次勝仗焚燬
賊營土城五座計殺斃賊匪七八千人內長髮
賊死者甚衆奪獲旗幟器械無算

同日向榮奏言臣查金陵城外險要首在鍾山
其次則七橋壩兩處賊營互相援應最爲堅固
必須先破七橋壩以分其勢則鍾山與南門外

雨花臺等處賊營聲勢不能聯絡然後左右進攻我兵方可得手臣與許乃釗等悉心商度於十一日子時密派提督蘇布通阿總兵馬龍帶領川兵屯兵川勇捷勇分爲四隊於寅刻暗襲七橋鹽賊營先飭總兵和春等帶領官兵分左右兩路聲言進攻鍾山使彼瞻顧本營不敢輕出救援蘇布通阿馬龍先於丑刻密遣川勇四

百名繼至賊營之後豫行埋伏又分撥捷勇屯
兵從橋左右潛涉過河親督副將虎嵩林明安
泰等帶領四川官兵進至橋頭乘天未明四面
齊攻該逆從睡夢中驚起蒼黃罔措黎明後又
大霧迷漫對面不能見人我兵乘勢搶入賊營
火罐噴筒一齊拋擲該逆無處躲逃登時燒斃
無數聞有潰圍而出者俱爲兵勇斬獲殆無漏

網所有挨近大小四營無一賊敢於出救臣又親自督兵前往接應我兵愈加奮勇乘勝分隊前進卽將毗連三座賊營先後攻破臣當令蘇布通阿馬龍等卽將賊壘趕修進紮七橋壘先據要地再圖攻克鍾山及雨花臺兩路我兵自丑至午先後攻打已閱六時兵力疲乏卽令收隊亥刻又密遣捷勇潛赴七橋壘西燒燬賊營

一座斃賊無數計本日燒斃賊匪三百餘名斬
取長髮首級五十餘顆生擒四百餘人救出脅
從難民一千餘衆臣當將奮勇兵壯尤爲出力
者酌加犒賞以示鼓勵一面仍趕緊設法進攻
鍾山及雨花臺等處賊營

向榮又奏言臣接琦善來信知逆匪占踞揚州
府城築壘空濠於城外要地處處設防甚爲周

密覈與金陵城外情形大略相同首逆僞東王
楊秀青往來金陵揚州之間又聞賊有由浦口
六合北竄之說黑龍江官兵六起已到浦口卽
令在彼駐紮其六合儀徵俟吉林兵到再爲布
置臣聞信之餘正深焦急幸續接琦善信知我
兵於初九日大獲勝仗該逆南北被創當不敢
復萌北竄之念臣總當埽平賊壘克復省垣保

全蘇浙大局不敢稍有鬆懈查逆匪自攻破武昌以前從未分股近因裹脅日衆遂敢肆行分擾其實從前起事逆黨三載以來勦斃已多今又分股心腹愈少至後來脅從人數雖衆其心不一我兵果能深溝固壘使賊無隙可乘接仗時槍礮近而後發卽足制勝臣年來與該逆大小二百餘戰知之較深曾於安慶途次告知琦

善及陳金綬務使兵將共明此意膽氣旣壯卽可轉敗爲功至於水上火攻事宜上游一路臣已於太平糧臺密爲置辦惟盧應翔所帶湖南礮船及臣續調江西大礮均尙未到未敢輕進其下游所調各海口戰船應如何上攻之處總未據楊文定確實咨覆臣恐其猶豫不進坐失事機訪有定海鎮總兵周士法諳悉水師業經

調赴鎮江統率師船進剿惟一時難以速到特
先派鄭魁士前往江陰督催各船迅赴京口聽
候調遣其陸路又續派提督鄧紹良帶兵一千
名與總兵李璫所帶二千名均在丹陽會齊與
舟師密約水陸夾攻務期克復鎮城以爲東南
保障又鄧紹良係江南提督所帶兵力如有不
敷本省之兵尙可隨時調遣臣均已面授機宜

酌量辦理均奏入

上命軍機大臣傳諭琦善陳金綬勝保曰逆匪竄踞揚州負隅抗拒該大臣等親督官兵進攻屢獲勝仗此次焚燬賊營土城五座殺斃賊匪七八千人長髮賊死者甚衆辦理甚合機宜本日復據向榮奏連破賊營四座燒燬一座並占據七橋壘要地是兩路勦辦均已得手正宜乘勝痛勦以期迅掃妖氛金陵鎮江

各匪已由向榮督兵進攻江北情形自以克復揚州
爲最要現雖大挫兇鋒而賊情鬼蜮難保不窘極思
竄仍宜於攻剿之餘防奔竄之路斷不可稍涉大意
淮徐一帶雖有楊殿邦等分路設防而兵力單弱且
自淮而北一路平坦無險可扼僞賊匪被剿窮蹙大
隊北竄淮徐猝不及防蔓延更爲可慮著該大臣等
悉心妥籌總期防剿兼施勿令賊匪乘間北竄

上又命軍機大臣傳諭向榮許乃釗曰據向榮奏連破賊營大獲勝仗並籌攻鎮江情形該大臣前奏於通濟門外襲剿賊營數日之內復連破賊營四座燒燬一座將七橋壘要地襲據使賊勢不能聯絡即可攻克鍾山雨花臺以便收復省垣覽奏欣慰該大臣自統師以來倍著奮勇膽氣尤壯實屬不負委任本日適據琦善等奏於十二日燒燬揚州賊營五座斃賊

七八千人大獲勝仗可望剋期收復揚州是該逆經
南北兩處大兵攻剿必有不及兼顧之勢該大臣務
卽乘勝厲兵痛加勦洗尤須密防城內首要逆匪窮
蹙奔突據稱楊秀青往來金陵揚州之間又聞賊有
由浦口六合北竄之說逆賊鬼蜮伎倆往往避實擣
虛向榮深悉賊情務須隨時知照琦善等南北聲息
聯爲一氣萬勿墮其奸計所有浦口已到之黑龍江

官兵經琦善派令在彼駐紮該處距江甯甚近著該大臣隨時飭知帶兵之員嚴密防堵毋令該逆潛蹤偷渡致誤事機所調湖南礮船江西礮位因何遲久未到卽著飛札嚴催惟該大臣已派鄧紹良李瑞分帶兵丁會齊丹陽進剿鎮江之賊是水路師船刻不可緩本日復諭令楊文定並諭麟桂吳健彰迅帶海口戰船至京口爲夾擊之計楊文定退守江陰恐不

免遷延畏葸該大臣卽與許乃釗妥籌知照楊文定
卽飭鄭魁士迅速督催各船上駛以應急需定海鎮
總兵周士法旣據向榮查知熟諳水師卽著催赴鎮
江會督師船協剿總之江面賊船必須設法焚剿淨
盡使賊南北隔絕庶可一鼓殲除

上又命軍機大臣傳諭楊殿邦楊以增曰遊擊馮景尼
業經飭令帶勇赴剿知府福楫帶勇三千名是否足

資守禦楊殿邦楊以增於北路防守事宜究竟作何
布置現據琦善向榮陳金綬等疊次奏報勦辦江甯
揚州賊匪屢獲大勝該逆受創窮蹙難保不豕突狼
奔儻大股逆匪直趨淮浦該督等何以禦之且賊匪
竄踞各處每於城外添築土木各城層層設備以圖
堅拒我師豈該督等於淮安清江一帶獨不能設法
嚴防耶現在南路攻勦雖可期得手而北路防守尤

爲喫緊該督等務須扼要布置計出萬全切勿專靠南路大兵以爲可幸無虞儘敢稍涉大意致有疏失朕惟楊殿邦楊以增是問

上又命軍機大臣傳諭楊文定麟桂吳健彰曰本日據向榮奏連獲勝仗並派提督大員水陸進取鎮江又據琦善等奏攻勦揚州賊匪亦經疊次獲勝大江南北焚殺逆匪不下萬餘克復三城在此一舉江上火

攻水師最爲緊要該署督所帶廣艇師船自焦山一挫之後匿跡江陰至今並無續奏究竟現有廣艇若干師船若干麟桂願備兵船入江助剿此項船隻是否已到向榮又咨調浙江總兵周士法統帶水師前來應援若能將京口停泊賊船先行掃蕩陸路有鄧紹良李瑞帶兵夾擊鎮江一城不難先行收復該署督不可仍事遷延致失事機麟桂吳健彰所辦船隻

何時駛入江口卽行飛報向榮聽候調度務當聲息相通水陸並進迅殄羣醜以慰朕懷

上諭內閣曰該逆竄擾江北擄掠橫行經琦善等親督官兵旬日之間疊獲勝仗實屬可嘉之至昨已降旨優加賞賚琦善調度有方著加恩賞戴花翎至該官兵等如此奮勇朕心甚悅前發去賞件著擇其尤爲出力者分別頒給並傳旨獎勵指日克復揚郡再當

渥沛恩施直隸署遊擊白含章中礮陣亡著照例賜卹陣亡兵丁查明一併議卹

上又諭內閣曰向榮於三月初六日襲破通濟門外賊營之後於十一日與許乃釗彭玉雯籌商派提督蘇布通阿等帶領兵勇於寅刻暗襲七橋礮賊營該大臣親自督兵前往接應我兵愈加奮勇當將賊營先後攻破進紮七橋礮據定要地復於亥刻遣捷勇潛

赴七橋壘西燒燬賊營一處該大臣自統師以來倍
著奮勇膽氣尤壯實能不負委任深堪嘉尙前頒發
賞件想已祇領所有出力提鎮將弁並受傷之都司
嚴成恩守備張金燦等均著傳旨獎勵擇其尤爲出
力者將前所頒賞件分別賞給陣亡兵丁著咨部議
卹

二十一日
乙丑李傳奏言臣查統兵各臣如向榮

琦善陳金綬等所帶各省官兵不爲不厚此外
怡良慧成楊殿邦楊以增等又各帶兵數千名
臣現防兗沂曹一帶奉

旨添調山西陝甘兵七千名尙不在內固已師徒廣集
士馬飽騰調度果得其宜醜類何難殄滅況偵
探長髮賊不滿五千餘皆裹脅而數省蔓延不
能稍挫其鋒者實由守土之官先事張皇帶兵

之將臨敵畏蒞以致紳民遷徙士卒潰奔疊陷
名城職此之故伏思

天威震怒

命將出師誠不惜數千萬帑金救民水火並使失機者
皆議罪違律者不加寬天下士民咸知怯戰之
非靡不振臂奮起賊卽金陵竊踞何異釜底游
魂趁此四面圍攻立可一鼓殲盡是兵力之厚

事機可圖莫若此時臣以爲斷不可再有續調
勞苦遠方近來兵驕將懦沿途騷擾其弊不可
勝言卽如二月間黑龍江官兵行抵東境需索
多方甚或紛擾民舍不服彈壓並偏令車騾過
站倒斃許多地方官酌價賠給困官病民莫此
爲甚是戰守尙未見有益各處已受累無窮此
後正值農忙更恐相繼滋擾激成事端應懇

天恩俯念南省調集官兵足資防剿所有吉林黑龍江
及歸化綏遠密雲熱河各路勁旅如已起程卽
暫緩前進或留於京畿以壯聲勢庶內外控制
嚴密吏民安堵如常防患未然非僅爲勞師糜
餉起見也奏入

上命軍機大臣傳諭李傅曰逆匪竄踞金陵分擾鎮江
現經向榮督兵將賊營連次燒燬痛加剿洗揚州賊

匪亦經琦善陳金綬勝保等督兵進剿斬獲甚多逆
鋒大挫惟三城尙未克復賊勢奔突南北靡定山東
與江南接壤地方防剿最關緊要而畿輔重地亦不
能不豫爲設防朕所以特調各路重兵前往山東及
江南淮徐等處以備攻剿且可彈壓地方鎮靜人心
俾吾民有所憑恃不致驚惶遷徙非不知帑餉難籌
兵差難辦實出於萬不得已之苦心也現在軍務方

馬賊目在門外指揮督戰我兵遂以一半攻營
一半回擊賊目吶喊直前該逆不敢抗敵卽時
回遁兵勇追上砍殺無數斬取長髮首級七十
餘顆追至朝陽門外該賊目隨卽閉門城上礮
石雨下未能搶進臣以接戰過久收兵暫息卽
傳令將挑出奮勇兵壯多備火具於是夜四鼓
乘月襲燒賊營三更後忽見鍾山前後五營一

齊火起明孝陵饗殿亦燃卽催隊直至鍾山旋見南門雨花臺各賊營同時火光燭天當卽擒獲賊匪數十名鍾山各營之賊自知萬不能守連夜自行焚燬於朝陽正陽通濟各城門外將舊營加高培厚爲退守計此十三日接仗後賊匪燒營退守之大略情形也臣現探查南門以西漸與水路相近擬卽進兵截擊夾江賊船惟

是夾江紆折火攻船隻斷不能到隨飛調新抵
太平之滇黔官兵一千二百名及守護糧臺之
陝西官兵一千二百名迅速馳赴板橋一帶步
步爲營進紮雨花臺既可遏賊南竄東壩及回
竄太平之路兼可偏近夾江水次一面再由大
營撥兵前往城南迤西紮營兩路官兵聲勢聯
絡更與上游火攻礮船相近可以互爲聲援惟

鍾山雖得而距賊甚近城上及朝陽門口賊營礮子均能打及一時不便紮營刻下賊已退守城門不敢輕出須用計取擬與城門脅從之衆潛通消息再行動手方能有濟水上燒船之事亦已次第辦理一俟大礮解到天氣乾燥即可相機行事

向榮又奏言江上賊船非火攻不能制勝惟是

該逆防守極嚴必須先將江中形勢及賊踪停
泊所在一一查探明確方能下手臣查該逆小
船皆聚夾江口內已用浮橋斷路復於江中沙
洲安營設礮以護浮橋於南岸近船之處環以
木城連營固守夾江口外厚集木簞通連兩岸
橫截大江防我西面下擊是上游欲用火攻非
先破大木簞潛渡沙洲從陸路拋擲火罐火輒

不可其下游大隊賊船全在浦口以便南來復
於下游厚集木簞通連兩岸橫截大江防我東
面上擊是下游欲用火攻非火船礮船從京口
乘風上溯不可所有上游應備火攻船隻及水
摸人等已於蕪湖當塗密爲豫備惟是火船之
後必須繼以礮船方能得力除湖廣先到礮船
九隻外已令臣子向繼雄添造六隻惜大礮不

敷配合江西續調之礮亦尙未到已將大營新
獲賊礮重五六百斤者陸續解赴當塗應用盧
應翔管帶湖南礮船十四隻礮勇四百名甫於
三月初十日駛抵當塗卽令與向繼雄同候調
遣至下游賊船必得署督臣楊文定趕緊設法
將所雇各船東路駛上方能兩面夾擊該署督
此時仍在江陰以等待海上各船爲名江南與

論沸騰臣奪鍾山原爲俯擊金陵遠控鎮江起見惟省城爲賊所踞沿江水路近處皆不能通太平已隔一百四十里鎮江江陰尤爲遠莫能及火攻之事處處不能應手此時金陵南門以外有路可通水次卽當趕緊設法辦理奏入

上命軍機大臣傳諭向榮許乃釗曰鍾山爲金陵形勝之地距城甚近可以俯瞰城中最爲要地現在奪獲

而一時未便紮營不可稍涉大意復令該逆竄踞至江面賊船自以火攻爲要所有上游應備船隻及水摸人等該大臣業已密爲豫備並令向繼雄及盧應翔管帶礮船駛抵當塗聽候調遣其下游應用船隻已有旨諭令楊文定設法籌辦並疊諭麟桂吳健彰由上海雇覓師船由海入江該大臣已派員迎提戰船惟楊文定久駐江陰毫無展布其畏怯情形已可

概見恐不足恃許乃釗現署巡撫責無旁貸此時麟桂等所覓上海各船如已趕到著卽與麟桂密商約定上下游同時夾擊務將江面賊船焚燬淨盡斷其南北往來之路則賊勢自可坐困而鎮江一城可先克復惟現在大隊賊船全在浦口江甯城內外賊匪被勦窮蹙難保不由浦口渡江北竄本日已諭令琦善等隨時防範該大臣等仍當一面督兵進勦力圖

收復仍一面偵探賊情如有渡江北竄之信卽行派
委得力將弁設法截擊並飛咨琦善等趕緊堵禦萬
不可稍有疏虞

上又命軍機大臣傳諭琦善陳金綬勝保曰逆匪竄踞
金陵分擾鎮江現經向榮督兵攻勦疊獲勝仗已將
鍾山奪回省城當可克復惟賊匪被勦勢必紛紛北
竄且江面賊船未經懲創江北一帶防堵最關緊要

著琦善陳金綬勝保等督飭將弁兵勇扼要堵截務將揚州賊匪迅速殲滅克復府城毋令賊黨久踞乘閒奔突聞淮河水涸賊船自五臺山至九龍山均已擱淺正可乘此機會設法火攻聚而殲旃至浦口江面爲大隊賊船聚集之處向榮已將火攻船隻及水摸人等密爲豫備並派員管帶礮船礮勇一俟上海船隻提到卽相機焚剿著琦善等豫籌布置密爲援

應若能水陸夾擊斷賊南北之路定可迅殄妖氛所
有江北淮揚徐州一帶地勢險隘現在紮營地方及
防堵處所著繪圖貼說具奏

上諭內閣曰向榮奏續獲勝仗奪回鍾山覽奏欣慰向
榮自到金陵疊次勦捕逆匪運籌制勝悉合機宜著
賞穿黃馬褂並頒給祗領以示嘉獎該大臣卽與該
署撫許乃釗悉心籌畫乘勝攻勦克復省城在事出

力各員定當同邀懋賞勉之望之

向榮又奏言臣派天津鎮總兵李瑞帶兵二千
名前赴常州府城駐紮原爲控扼要路安撫民
心起見乃該鎮稟稱常州城垣太舊難以守禦
祇得扼要堵截等語此言一出必致民心驚惶
似此心存畏葸庸懦無能難勝專閫之任應請
旨降爲遊擊留於軍營聽候差遣以觀後效所有該鎮

統帶兵二千名已飭令歸於提督鄧紹良統帶
以資克復鎮城奏入

上從之

同日李億奏言伏查東省兗州之嶧滕沂州之
鄒城均與江南之豐沛邳州沐陽海州桃源宿
遷等處毗連其交界處南去黃河八九十里百
數十里不等道路處處可通形勢散漫臣統籌

全局與其分遣各處歧出而防剿難周何如嚴
守黃河憑險而聲勢聯絡且以重兵扼守黃河
兩岸要地兼令沿河文武廳汛督飭兵役上下
巡防不但逆賊不敢北竄土匪亦難偷渡因思
淮安之清江浦已有河臣楊以增遏其前今擬
以托明阿統帶歸化綏遠等兵三千五百名繼
其後卽在該處助剿益足壯我軍威是爲折衝

之師由清江浦渡黃北岸爲王家營擬以夾經
統帶密雲兵一千名再由臣添派山西兵一千
名分布該處稽船隻之偷越樹對壘之聲援是
爲策應之師由王家營以上七十里至桃源縣
北岸之重興集淮安府所轄也擬派兗州鎮臣
百勝帶山西兵二千名駐之探賊情虛實量我
師堅瑕或分趨或旁擾緩急因時進退有法是

爲攻守兼用之師又由重興集沿河而上百里
至宿遷縣之順河集爲江南北來要道擬派陝
安鎮臣郝光甲帶陝甘兵三千名駐之其宿遷
縣以北距城數里爲山湖分路之處臣擬帶陝
甘兵一千名輔以本標兵二百名駐之該處呼
應旣靈調度無慮稽遲省署文案事宜亦可兼
顧如此黃河兩岸節節嚴防藉天險以施人力

事半功倍較之交界堵禦殊有把握如各該處
尙有不敷彼時調回前赴河南兵一千名量爲
接濟不致再虞短少其省城本屬腹地臣標左
右兩營並濟南城守營兵千餘名加以練勇數
百名足敷彈壓毋庸另派客兵轉致紛擾此外
曹州府屬之劉家口董家口二處南岸係河南
歸德府境情形較輕臣已先派遊擊張遇祥帶

兵駐紮防守並咨曹州鎮臣三星保時常往來
稽查亦可不致疏虞奏入

上命軍機大臣傳諭李德曰現在琦善向榮等連獲勝
仗賊勢窮蹙難保不乘間北竄黃河兩岸尤宜處處
嚴防該撫駐紮宿遷迤北爲山湖分路之處調度無
慮稽遲卽就近督同兗州鎮總兵百勝等統帶弁兵
分扼要隘並知照托明阿奕經互相聯絡以壯聲援

至曹州府屬之劉家口董家口等處既已派兵防守
仍隨時飭令總兵三星保往來梭巡不可稍涉大意
上又命軍機大臣傳諭奕經曰前有旨令奕經統帶密
雲官兵一千名前往江南山東交界地方防堵疊據
琦善向榮等奏報續獲勝仗難保賊匪不窮蹙他竄
著奕經迅帶所調密雲官兵前赴王家營駐紮與清
江浦防剿之兵互相策應仍當隨時察看何路緊要

卽往何路扼守並與慧成李億知照辦理毋誤事機
上又命軍機大臣傳諭托明阿曰現據琦善向榮等馳
奏續獲勝仗難保賊匪不窮蹙他竄著托明阿督帶
所調官兵三千五百名前赴清江浦駐紮與楊以增
協力防剿仍當隨時察看何路緊要卽往何路扼守
並與慧成李億知照辦理毋誤事機

二十三日

丁卯

代理江蘇巡撫布政使倪良耀奏

言粵匪自長江東下蘇省各府早經戒嚴迨至
竄擾江甯鎮揚失守蘇常等屬尤爲喫緊本省
額兵留營甚少前經撫臣楊文定奏調浙江山
東兵各二千名又經臣督飭各屬雇募壯勇隨
時訓練以備調遣現在山東兵除前到四百名
外未據報有續到浙江兵已到一千一百二十
名並安慶折回兵三百名由副將都隆阿等分

帶駐紮無錫縣屬之皋橋黃埠墩等處又陸續
雇募各起壯勇七千七百餘名亦經分派常州
府屬各處防守並恐兵勇人數既多分散各處
無所統率現在向榮派天津鎮總兵李瑞管帶
四川湖南貴州等省兵二千名至丹陽常州一
帶防堵所有各兵勇應卽移咨該鎮就近調度
約束俾可相機策應聯絡聲勢如隨後再有續

到另行察看情形分別派撥奏入報

聞

二十五日己綏遠城將軍調任江甯將軍托明

阿奏言臣奉

旨統帶綏遠歸化等城駐防官兵共三千五百名前往
山東會同李德擇要防堵遵卽飭令前調之土
默特蒙古官兵一千名續調之二千五百名趕

三十一
緊齊備以便帶往起程惟查續調之歸化城土
默特蒙古官兵二千五百名係種地土兵未經
訓練難期得力而軍裝器械均未齊備似未便
令其前往可否仰懇

天恩卽於各省現在所調官兵內就近補撥一二千名
俾臣統帶馳抵山東防堵以重軍務再臣於本
月二十日督帶官兵起程奏入

上命軍機大臣傳諭托明阿曰土默特蒙古兵未經訓練難期得力且軍裝器械亦不齊備著照所請此次續調之歸化城土默特蒙古官兵二千五百名無庸調往軍營該將軍卽統帶綏遠城前後所調駐防官兵一千名土默特蒙古操演兵一千名共二千名迅速馳往清江浦一帶現在慧成已抵淮徐地方著該將軍卽與籌商扼要防剿並可爲琦善陳金綬等應

援毋稍延緩

同日

上諭內閣曰所有前經飭調之盛京官兵將次來京卽著署金州副都統杭州將軍瑞昌統帶前赴淮徐一帶會同慧成防剿其吉林官兵著恩華統帶前赴直隸會同訥爾經額擇要駐紮以備調遣

二十七日

辛未

琦善陳金綬勝保奏言自三月十

四日陰雨連縣至十九日尙未晴霽平地水深
尺許該逆深溝高壘負固不出我兵仰攻殊難
得力臣等焦灼實深查瓜州在揚城之南淮安
在揚城東北臣等在西北兩面迎擊正所以杜
其北竄現在揚州赴淮一帶運河水勢僅存尺
許不惟重載難行卽小船亦俱淺擱是水路賊
船不能竄至淮安又據泰州知州張之杲稟稱

三月初七等日均有賊匪至該州交界仙女鎮等處搶擄經該州團勇分起殲斃賊匪五十餘名自大兵到後並未滋擾地方尙屬安謐等情查該州壤接揚州旣無被擾其以下之泰興等處不問可知陸路道途紛歧揚城西北兩路可以上竄者臣等均已紮立營盤賊匪不敢繞越惟東面一路可由灣頭仙女邵伯等鎮上赴淮

安清江其由西北至東門橋梁早被賊匪拆毀
均於要隘紮立賊營此時我兵無從繞越若徑
往攻打又恐該逆乘間由西北竄出是以札調
遊擊馮景尼帶領兵勇在灣頭鎮安營堵截並
飭知府福祿帶領徐州壯勇二千名在附近灣
頭上方寺紮營爲馮景尼後路援應至六合縣
之甘泉山陳家集兩處地方臣等已將

飭調來營之山東兗曹二鎮官兵一千名分派駐紮以
截其上竄之路惟儀徵縣祇有團練鄉勇防守
俟前調陝甘兵一千七百餘名到時再行籌撥
防堵查現踞揚城賊匪自初九日經臣等攻其
不備又經連日合兵痛勦其鋒已挫該逆惟恃
土壘木城於揚城內外分股屯聚東西北三面
要隘處處堵截亦不敢乘閒逃竄擬察看情形

一二日內卽督兵分路直搗賊巢力圖克復
琦善陳金綬勝保又奏言查清臣楊殿邦於
等抵揚州府時尙在淮安府駐紮現聞已由高
郵前進距揚州百餘里所派接應之淮揚道曹
文昭及副將李輝遠並未據報行抵何處至劉
良駒但明倫二員臣等詢據紳民僉稱賊匪於
二月二十三日申刻竄踞揚城劉良駒但明倫

先於二十二日戌亥之間隨漕督楊殿邦乘舟
至上游一帶退守現在該二員下落不知如何
知府張廷瑞江都縣知縣亦不知去向惟甘泉
縣知縣梁園棣曾赴營稟見臣等詢以因何走
避據稱該府縣因逆匪犯境恐兵勇單弱勢不
能支且大吏皆已先行亦卽隨同出城揚城竟
爲賊踞等語臣等聞此情形殊覺出人意外惟

有極力籌畫設法克復以杜北竄

同日左副都御史雷以誠翰林院侍讀學士晉
康奏言逆匪現竄揚州近距清江三百餘里高
郵寶應一帶更爲清淮門戶南有高寶等湖北
距運河隄路狹隘隔壩重疊若運道各隔逐節
關閉下游淤淺不便帆檣則賊上竄之路惟有
運河長隄隄上再安設礮位派兵固守可期得

力至防江岸之賊則宜守廬滁一帶要隘以定
遠鳳陽爲後路並於徐郡厚集兵力以資接濟
度賊必無北窺之志此防河不如防江之事半
功倍也現聞向榮勝保陳金綬琦善等雖連獲
勝仗然未能卽時克復者因各城失守大小礮
位並火藥鉛彈俱爲賊有以致反客爲主在彼
守之愈固則在我攻之愈難卽使幸獲全勝而

餘黨數萬恐難一鼓盡殲賊旣不能回奔亦且
出海無路勢將激而北竄當此大兵未齊與賊
相持之際正宜先其所急不可坐失事機若不
及早運籌恐揚州戰敗之賊鋌而走險或避甘
泉山大軍徑趨高寶犯及清淮又江甯戰敗之
賊或竄徽省由廬滁定遠鳳陽直抵徐州等處
西可以向河洛北可以走山東其勢不能堵禦

恐復蹈失險之故轍曷若慎選精銳擇要扼守
兵不久頓餉不虛糜蠹茲逆匪直如釜底游魂
計可剋期殄滅立奏膚公矣均奏入

上命軍機大臣傳諭琦善陳金綬勝保曰該大臣等現
在揚州西北兩面迎擊該逆不能分竄潛匿不出計
賊匪攻陷揚州已踰一月前雖節經該大臣等獲有
勝仗而該逆負嵎抗拒以老我師是其慣技惟當用

計誘令出巢我兵方可併力圍攻該逆在城抵拒何處較爲疏懈其城外之土壘木城應如何攻破如何設法縱火焚燬使逆賊失所憑依郡城自可剋期克復其東面灣頭一路可通仙女邵伯兩鎮直達淮安清江馮景尼福楸所帶兵勇恐不足以資控禦已諭慧成統帶重兵由徐州一帶徑赴該處督同堵截該大臣等務當合力進攻互爲聲援斷不可令賊匪乘

聞北竄查文經已令護理漕督卽可令其統帶揚殿
邦之兵勇督同馮景尼等辦理防剿所有河南應行
解運餉械業據陸應穀奏報均經趕運前進計此時
已可全數到營陝甘官兵卽著該大臣嚴催撥往儀
徵防堵本日又據雷以誠等奏大兵與賊相持若該
逆於揚州戰敗後或避甘泉山大軍徑趨高寶犯及
清淮或於江甯戰敗後由廬滁定遠鳳陽直抵徐州

西可以向河洛北可以走山東等語琦善等一面攻
剿揚州賊匪仍隨時知照向榮旣不可使該逆竄出
後渡江而南與金陵賊匪會合尤須刻刻防其北竄
設有疏虞所關非細諒該大臣等必能籌畫萬全迅
奏膚公也

上又命軍機大臣傳諭慧成曰據琦善等奏籌定防剿
情形湯城西北兩路均已紮立營盤賊匪不敢繞越

東面一路遊擊馮景尼帶領兵勇在灣頭鎮安營堵截知府福楸帶領壯勇於附近灣頭上方寺紮營爲後路援應惟馮景尼所帶兵勇究恐單薄灣頭爲東北要隘必須重兵防守方能遏其北竄此時慧成計已馳抵淮徐一帶著卽統帶官兵督率馮景尼福楸等擇要防剿與琦善陳金綬勝保軍營互爲聲援合力進攻儻該逆勢窮奔突卽分路截擊以遏兇鋒奕

經托明阿等所帶密雲歸化綏遠官兵並陝甘調撥官兵陸續趕到並著慧成酌量調遣總期揚州及早克復江北肅清則金陵勦辦更易得手慧成經朕特簡諒必能相機應變以副委任

上又命軍機大臣傳諭向榮楊文定許乃釗曰現當勦賊喫緊之時大江南北兩岸雖屢獲勝仗而賊船橫梗江面毫無顧忌儘各路船隻不能及時攻勦任令

該匪南北自如何時始就殄滅耶本日諭令黃宗漢飭令麟桂會同吳健彰將上海雇備各船迅速駛入江口以備該大臣調遣楊文定退守江陰已難辭咎乃屢奉嚴旨尙不趕緊設法督船進剿豈坐觀成敗竟能置身事外耶向榮前派鄭魁士往江陰迎提船隻未知能否得力仍著派員催提麟桂等所覓各船如有入江確信著向榮許乃釗密商布置其上游嚴

船應於何處會齊同時夾擊務將江面賊船焚燬淨盡迅掃妖氛

上又命軍機大臣傳諭葉名琛柏貴曰逆匪竄踞江甯揚州鎮江等府疊經琦善向榮馳奏屢獲勝仗大挫兇鋒惟賊船蟻聚江干非有得力舟師不能制勝前飭調之廣東外海師船既據該督等奏稱笨重難行能否駛入長江尙難豫定現當江面攻剿喫緊之際

著葉名琛柏貴迅卽將紅單船隻酌定數目趕緊募
雇配帶礮位鉛丸火藥卽派遊擊黃開廣管領星速
由海入江聽候向榮等調遣以資攻擊如黃開廣距
省尚遠調到需時卽著該督等另派熟習情形員弁
管帶前進飭令該遊擊隨後駛赴江南協同攻剿

上又命軍機大臣傳諭黃宗漢曰前因賊踞鎮江等處
急需兵船攻剿疊經諭令麟桂吳健彰趕緊雇備船

隻駛入江口助剿想該藩司等屢奉諭旨當已早爲
齊備現在江甯城外連燬賊營而水路賊船麕聚必
須此項船到方能水陸夾攻以清江面著黃宗漢卽
飭該藩司將所備船隻並吳健彰所雇船隻親爲統
帶前赴鎮江等處聽候向榮調度萬不可稍有遲誤
上諭內閣曰前因逆匪東竄揚州防堵最爲喫緊特令
漕運總督楊殿邦督同前兩淮鹽運使但明倫兩淮

鹽運使劉良駒辦理防堵乃賊匪竄入揚城楊殿邦輒先期退至上游但明倫劉良駒及揚州府知府張廷瑞等迄今查無下落實屬罪無可追楊殿邦但明倫劉良駒張廷瑞並甘泉縣知縣梁園棣均著革職交部分別定擬罪名具奏楊殿邦仍著留於清江浦隨同楊以增辦理防堵帶罪自效其江都縣知縣著該部查明一併革職交刑部治罪

同日刑部奏言遵議京口副都統文藝罪名擬請發往新疆效力贖罪奏入

上諭內閣曰文藝著照刑部定擬發往新疆效力贖罪現在京口駐防官兵督率乏人著暫留該革員統帶俟新任副都統長安抵任再行發遣

二十九日癸酉琦善陳金綬勝保奏言二十二日

分路進攻賊營臣琦善派總兵雙來帶領官兵

攻其中壘儀使武慶副將松齡等攻其右派遊
擊英貴等帶兵接應又令侍衛伊興額等管帶
綠營馬隊分兩翼從旁抄截一面知會陳金綬
勝保一同督兵攻勦雙來帶兵先到城北遇有
河渠卽令軍士用袋土立時填墊一擁而過直
擣賊巢槍礮齊施突向北門攻打該逆果不料
官兵乘霧驟至倉猝迎拒不敢出巢僅在木城

內暗放連環大礮形同驟雨我兵不避兇鋒奮力進剿忽有手執黃旗賊首擁出卽被我兵用銅礮轟斃賊衆仍復奔回潛匿不出我兵因從下仰攻驟難得手暫退數武故示以隙該逆果率衆搶出我兵見賊離巢當卽大聲喊殺擊斃無數並將騎馬賊首立時轟斃槍獲礮械多件賊復退回土壘木城藏匿臣陳金綬督帶直隸

官兵進攻廿四橋賊營先於沿路土坡及林深
草茂處所分兵設伏選派官兵上前誘敵賊營
開放大礮我兵佯敗該匪追趕我兵猛起擒殺
賊匪百餘名該匪立即退敗臣勝保督帶壯勇
由觀音山進攻法海寺賊營分兩路撲剿該逆
望見我兵即開礮迎敵我兵避開礮路奮勇直
前轟斃賊匪數十人賊衆在牆內搖旗吶喊匪

不出戰統計三面分攻自寅至酉傷斃賊匪四
百餘名擊斃黃衣大頭目三名揚城內外之賊
經臣等督兵痛剿現在不敢離巢但賊匪環城
築壘層層遮護我兵不能繞越其後僅從對面
勦擊臣等行營又無大礮目睹情形萬分焦灼
再四熟商凡破壘攻城之利器全恃大礮當先
臣琦善知直隸督臣訥爾經額鑄有大礮已飛

卷之三十一
臣督臣趕緊派員押送前來以備攻賊營壘奏
八

上命軍機大臣傳諭琦善陳金綬勝保曰逆匪盤踞揚
州環城築壘層層遮護我兵雖屢次獲勝總不能直
搗巢穴該大臣已飛咨請爾經額卽調大礮來營一
俟蔽位運到督飭各營將弁乘勢進攻總宜設法出
賊不意迅圖克復郡城尤當於城外水路要隘豫爲

布置防賊衝突北竄若能將江面賊船擊散則南北兩岸攻剿更易得手著該大臣等與向榮酌商迅籌辦理

三十日甲戌楊文定奏言臣於本月十九日統帶

水師副將李德麟等督率各船駛至北固山及大馬頭地方見有賊船數十隻隨卽開礮轟擊賊匪紛紛上岸內有黃衣賊目二名均被擊斃

賊船亦開礮迎拒我船隨擊隨進行至瓜州口
見有賊船排列如林岸上又圍築木城安設礮
位該逆水陸開礮拒敵我船奮力攻擊復獲賊
船二隻生擒賊匪二十二名隨將該二船焚燬
又燒大賊船七隻擊壞賊船百餘隻約計斃賊
數百人奏入

上命軍機大臣傳諭楊文定曰此次水師各船在北固

山等處擊斃賊目二人復進至瓜州口焚燬擊壞賊船多隻斃賊數百人勦辦尙爲得手陸路大兵亦先後據琦善向榮等奏報屢次獲勝軍威大振惟賊船橫梗江中往來自如必須先將水面之賊設法肅清並將鎮江剋期收復則江甯揚州大股賊匪南北隔絕彼此不能相顧兩路大兵進勦更易爲力現在上海及雇浙江各艇船已有二十餘隻浙江已報起程

之師船及上海夾板船二隻此時諒均馳到前據向
榮奏已豫備礮船火具在當塗一帶停泊專俟下游
師船駛到即可前後夾擊楊文定統帶師船一俟齊
備卽一面知會南北兩岸同日進攻並一面密約向
榮與上游各船兩路會勦兵貴神速總宜剋期進勦
萬不可稍有遷延

同日署湖北提督向榮署江蘇巡撫內閣學士

許乃釗奏言查該逆自七橋窰鍾山兩處險要
並失附近各營皆不能守先後自焚者二十餘
座東南賊壘十去其九卽西南隅之木城亦復
自行燒燬惟於各城門外深溝高壘爲退守計
近又探聞於城北一面東西兩旁各築土城一
道其地離下關較近所有賊船皆聚於此臣恐
該逆屢戰失利且兩旬以來解散賊黨不下三

四萬人其勢日孤萬一自知難守竟從江面他
竄追剿更難爲力臣等再四熟商不如緩攻金
陵先從水上去其船隻使江甯鎮江揚州三城
之賊首尾不能兼顧然後可以制其死命查三
城形勢鎮江最爲扼要蓋京口與瓜州相對而
京口又爲上海兵船進攻必由之路先復京口
則揚州江甯之賊應援自多中阻臣早擬從此

入手因上游礮船下游兵船未能剋期並到是以不敢輕舉盧應翔礮船到後卽令與臣向榮之子向繼雄督帶礮船二十八隻先由當塗開至江甯境內小河口以扼上游一面派鄭魁士隨同督臣楊文定由江陰一路督帶上游艇船及三板等船四十餘隻從圖山關順風上擊尙恐各船不能迅速隨又添派總兵和春沿江催

督此臣所籌水師大略情形也提督鄧紹良駐紮丹陽原帶精兵三千名又續撥川兵五百名廣東兵六百名抽撥無錫防堵浙兵四百五十名廣勇八百名令其統領會同副都統文藝管帶駐防兵八千名由馬陵新豐陸路進攻鎮城臨時再添派得力兵將前去爲水陸夾擊之計探聞賊船江上林立防禦甚嚴我軍礮船兵船

共止七十餘隻且上下分爲兩處多寡未免懸殊然不亟將江面肅清則該逆北竄回竄在在堪虞今大營陸路之兵由南而西漸近江口可與上游礮船聲勢聯絡鄧紹良兵進攻鎮城又與下游艇船三板船互相策應陸兵相助水師亦不嫌其單鎮江之賊現已被困不能更擾蘇常至金陵城南現又陸續安營設法相機進剿

此係東壩必由之路自可無虞竄往至溧水高
淳等處臣許乃釗已札飭該縣團練鄉勇以助
聲勢現在金陵近城各鄉亦皆一律團練遇有
長髮真賊鄉民立時格殺不致零星逸出琦善
等音信頻通遇有緊要事宜無不詳細函商如
探有逆賊他竄形跡總當隨時知會合力追剿
奏八

上命軍機大臣傳諭向榮楊文定許乃釗曰向榮許乃釗所稱先從水上去其船隻使三城之賊首尾不能兼顧又稱三城形勢鎮江最爲扼要先復京口則賊之應援自多中阻各等情與朕寄諭楊文定意見正相脗合該大臣等務當相機妥籌水陸夾攻總以神速爲妙萬不可遷延貽誤惟金陵大股賊匪堅拒不出且逆首均在城中必須嚴防奔突毋任乘間竄逸

應如何設計破城並著密籌辦理仍隨時知照琦善
等南北同時進攻毋失事機